

„Našo měnjenje pódpěra se na wědomnostne argumenty“

Serbski sejm co pytaś rozgrono z kněžařstwom dla ILO-konwencji 169

Ze Serbskego sejma. Serbski sejm njeakceptěrujo to rozkłaženje nimskego kněžařstwa, až ILO-konwencija 169, kótaruž Nimska co ratificěrowaś, njedej płaśeś za serbski lud. Na dopšaśanje Casnika we zachadnem tyženju, co nimske kněžařstwo se we tej nastupności mysli, jo ga powědař kněžařstwa dał k wěsći: „Konwencija dla domorodnych a we rodach (Stämme) żywych ludow z lěta 1989 měri se na staty, na kótarychž teritoriumje, za wětšy źěl ako rezultat kolonizěrowanja, bydli tak pomjenjona indigena ludność (...). Narodne mjeńšyny w Nimskej njeplāse ako domorodne abo we rodowych strukturach żywe ludy we zmysle konwencji“.

Powědař wustawowego wuběrka pśi Serbskem sejmje Hajko Kozel měni k tomu: „Rowno historija kolonizěrowanja [Łużyce] płaśi za serbski lud. Až rowno ten kriterium se nałožyjo ako argument pšeśiwo pśipóznaśu Serbow ako indigeny lud, to my wótpokažomy“. Za jogo suženim wobstoj how wjelika pótrjebnosť za rozjasnjenje, a Serbski sejm co se dla toho z kněžařstwom do rozgrona daś.

Serbski sejm měni, až serbski lud jo indigeny we zmysle konwencji. „Naša pozicija pódpěra se na wědomnostnu argumentaciju, ak jo wordowała předknejsona na serbskich kolokwiumach Bramborskeje techniskeje uniwersity w Chóšebuzu“ [kótarež 2013 a 2014 jo organizěrowała Założba Roža Luxemburg]“, dajo Kozel nam k wěsći.

*

Pjerwjej jo Serbski sejm se wobrośił na Kanclarski amt z pšosbu, aby kněžařstwo konwenciju ratificěrowało a z tym zrownju Serbow ako indigeny lud pśipóznało. Kanclarka jo jim pśigroniła, až ratificěrowanje konwencji jo zapisane do koalicyjskego wujadnanja. A wušej tego jo pisała: „Ludowe kupki a mjeńšyny su źěl kulturneje a historiskeje identity. Jich woplěwanje pśipomoga kulturnej wšakorakosci a móžo teke wuměnu mjazy statami mócowaś (...) Nimskemu kněžařstwom jo woplěwanje indigeneje ludności wósebnje wažne“. Kozel jo we tej kombinaciji wugronow póznał „pozitiwnu politisku wólu“, což nastupa pśipóznaśe Serbow ako indigeny lud. Jogo njezdaśe jo něnto šym wětše. **G. W.**